




შემოსავლების  
სამსახური



რა უნდა ვიცოდეთ  
საქართველოს საბაჟო  
საზღვრის გადაკვეთისას

ურთიერთობა მარტივია

ფიზიკური პირების მიერ საქართველოს სახელმწიფო საზღვრის გადაკვეთა შესაძლებელია განხორციელდეს მხოლოდ საერთაშორისო მიმოსვლისათვის გახსნილი საბაჟო გამშვები პუნქტების გავლით. საზღვრის კვეთისას პირის მიმართ ხორციელდება სასაზღვრო და საბაჟო კონტროლი.

## საკანონმდებლო კონტროლი

### ▶ საქართველოს მოქალაქის შემთხვევაში:

- ▶ საქართველოდან გასვლა/საქართველოში შემოსვლა ხორციელდება პასპორტით ან საქართველოში დასაბრუნებელ მონუმბით ან პასპორტის შემცვლელი სხვა სამგზავრო დოკუმენტით;
- ▶ თუ შუალედურ ან საბოლოო დანიშნულების ქვეყანაში შესვლისათვის აუცილებელია ვიზა, მაშინ დამატებით წარედგინება შუალედური ან/და დანიშნულების ქვეყნის ვიზა;
- ▶ 16 წლამდე ბავშვის საქართველოდან დროებითი გასვლა შესაძლებელია მისი ერთ-ერთი კანონიერი წარმომადგენლის ნებართვით და სრულწლოვანი ქმედუნარიანი პირის თანხლებით;
- ▶ მხარდაჭერის მიმღების საქართველოდან დროებითი გასვლა შესაძლებელია მხარდაჭერის წერილობითი თანხმობით, თუ სასამართლოს გადაწყვეტილებით სხვა რამ არ არის განსაზღვრული.
- ▶ 16-დან 18 წლამდე არასრულწლოვნის, თუ იგი არ იმყოფება რეგისტრირებულ ქორწინებაში, საქართველოდან დროებითი გასვლისათვის, პასპორტთან ერთად, აუცილებელია მისი ერთ-ერთი კანონიერი წარმომადგენლის ნოტარიალურად დადასტურებული ნებართვა.
- ▶ თუ არასრულწლოვანს საქართველოდან დროებით გასვლისას თან არ ახლავს კანონიერი წარმომადგენლები, მას მათი შუამდგომლობის საფუძველზე მიეცემა პასპორტი.

## ▶ უცხო ქვეყნის მოქალაქე:

- ▶ საქართველოს სახელმწიფო საზღვრის გადაკვეთისას წარადგენს პასპორტს ან მის შემცვლელ სხვა სამგზავრო დოკუმენტს;
- ▶ აუცილებლობის შემთხვევაში, საქართველოში ყოფნის ნებართვას: საქართველოს ვიზას ან ბინადრობის ნებართვას ან საქართველოში ლტოლვილის მონუმობას ან ჰუმანიტარული სტატუსის მქონე პირის დროებითი ბინადრობის მონუმობას.

სავიზო ინფორმაციის  
მისაღებად ეწვიეთ  
საქართველოს საგარეო  
საქმეთა სამინისტროს  
ოფიციალურ ვებგვერდს:



[www.mfa.gov.ge](http://www.mfa.gov.ge)



## უცხოელთა ან მოქალაქეობის არმქონე პირთა საყურადღებოდ!

საქართველოში კანონიერად ყოფნის ვადის ამოწურვის დღიდან, საქართველოში დარჩენის შემთხვევაში, გათვალისწინებულია შემდეგი სახის სანქციები:

- ▶ 3 თვემდე პერიოდის განმავლობაში - 180 ლარის ოდენობით;
- ▶ 3 თვეზე მეტი ხნით დარჩენის შემთხვევაში - 360 ლარის ოდენობით.

უცხოელის ან მოქალაქეობის არმქონე პირის მიერ საქართველოს ტერიტორიაზე ტრანზიტით მგზავრობის წესების დარღვევა გამოიწვევს დაჯარიმებას – 100 ლარის ოდენობით.

## რა დოკუმენტებს წარადგინს ავტოსატრანსპორტო საშუალების მძღოლი სამგზავრო დოკუმენტებთან ერთად?

- ▶ ავტოსატრანსპორტო საშუალების შესაბამისი კატეგორიის მართვის მონუმობას;
- ▶ ავტოსატრანსპორტო საშუალების სარეგისტრაციო დოკუმენტს;
- ▶ ავტოსატრანსპორტო საშუალების კანონიერ მფლობელობაში არსებობის დამადასტურებელ დოკუმენტს (თუ აღნიშნული გარემოება არ დასტურდება სატრანსპორტო საშუალების სარეგისტრაციო დოკუმენტით).

## რეგულარული საერთაშორისო სამგზავრო გადაყვანისას

- ▶ ავტორიზაცია ავტობუსით მგზავრების საერთაშორისო რეგულარულ გადაყვანაზე;
- ▶ პარტნიორი ქვეყნების კომპეტენტური ორგანოების მიერ დამონმებული სამგზავრო ავტოსატრანსპორტო საშუალებების მოძრაობის განრიგი, ტარიფი, სამარშრუტო სქემა;
- ▶ გადამზიდველის მიერ სამგზავრო ავტოსატრანსპორტო საშუალების მართლზომიერი მფლობელობის დამადასტურებელი დოკუმენტი;
- ▶ გადამზიდველთან მძღოლის დასაქმების დამადასტურებელი დოკუმენტი;
- ▶ მგზავრების აღრიცხვის ბარათი, გარდა ცარიელი სამგზავრო ავტოსატრანსპორტო საშუალების გადაადგილების შემთხვევისა.

## არარეგულარული საერთაშორისო სამგზავრო გადაყვანისას

- ▶ ავტორიზაცია არარეგულარულ საერთაშორისო საავტომობილო სამგზავრო გადაყვანაზე;
- ▶ გადამზიდველის მიერ სამგზავრო ავტოსატრანსპორტო საშუალების მართლზომიერი მფლობელობის დამადასტურებელი დოკუმენტი;
- ▶ გადამზიდველთან მძღოლის დასაქმების დამადასტურებელი დოკუმენტი.

## ავტოსატრანსპორტო საშუალებით ტვირტის საერთაშორისო გადაზიდვისას

თუ საქართველოს საერთაშორისო ხელშეკრულებებით სხვა რამ არ არის გათვალისწინებული, უცხო ქვეყანაში რეგისტრირებული ავტოსატრანსპორტო საშუალების (ცარიელი ან დატვირთული) საქართველოს საბაჟო საზღვარზე გადაადგილებისას, დამატებით წარედგინება ერთ-ერთი შემდეგი დოკუმენტი:

- ▶ ავტოსატრანსპორტო საშუალებით ტვირთის საერთაშორისო გადაზიდვის ნებართვა;
- ▶ ან ავტორიზაცია საერთაშორისო საავტომობილო სატვირთო გადაზიდვაზე;
- ▶ ან საქართველოს ტერიტორიიდან საერთაშორისო სატვირთო გადაზიდვის ნებართვა.

## სატვირთო ავტომობილის მიერ ტრანზიტული ტვირთის გადაზიდვისას გზატსარგებლობის საფასური

- ▶ საქართველოს საბაჟო ტერიტორიაზე ტვირთების ტრანზიტულად გადაზიდვისთვის ერთ სატვირთო ავტოსატრანსპორტო საშუალებაზე (ტრაქტორები და უნაგირა სანეკარები და ძრავიანი სატრანსპორტო საშუალებები ტვირთების გადასაზიდად, გარდა მიკროავტობუსებისა) გზატსარგებლობის საფასური შეადგენს 200 ლარს.
- ▶ სატვირთო ავტოსატრანსპორტო საშუალებით ტვირთის ტრანზიტულად გადაზიდვისას ავტოსატრანსპორტო საშუალების მფლობელი/მძღოლი ვალდებულია საქართველოს საბაჟო ტერიტორიის დატოვებამდე:
  - ▶ შეიძინოს გზატსარგებლობის ბარათი ან
  - ▶ უზრუნველყოს გზატსარგებლობის საფასურის გადახდა საქართველოს ტერიტორიაზე არსებულ საბანკო დაწესებულებაში შემდეგ სახაზინო კოდზე: **302003277.**
- ▶ სატვირთო ავტოსატრანსპორტო საშუალებით ტვირთის ტრანზიტულად გადაზიდვისას ავტოსატრანსპორტო საშუალების მფლობელი/მძღოლი გზატსარგებლობის საფასურის გადახდის დამადასტურებელ ქვითარს ან გზატსარგებლობის საფასურის ბარათს წარადგენს ტერიტორიის დატოვებისას საბაჟო გამშვებ პუნქტში. წინააღმდეგ შემთხვევაში, სატრანსპორტო საშუალება ვერ დატოვებს ქვეყნის ტერიტორიას.

- ▶ გზათსარგებლობის საფასურის გადახდისაგან თავისუფლდება პირი, რომელიც, სატვირთო ავტოსატრანსპორტო საშუალებით, ახორციელებს საქართველოს ტერიტორიაზე საზღვაო ნავსადგურში არსებული საბაჟო გამშვები პუნქტის ტერიტორიაზე განთავსებული ტვირთის გადაადგილებას საბაჟო ორგანოს მიერ დადგენილი მარშრუტით, საზღვაო ნავსადგურის ტერიტორიიდან უახლოესი 10 კმ-ის რადიუსში მდებარე კონტროლის ზონაში ან პირიქით.

## საბაჟო კონტროლი

**საბაჟო კონტროლის განხორციელებისას საბაჟო გამშვები პუნქტის თანამშრომელი უფლებამოსილია:**

- ▶ განახორციელოს მგზავრის ზეპირი გამოკითხვა;
- ▶ შეამოწმოს პირადი ბარგი, ხელბარგი, სატრანსპორტო საშუალება;
- ▶ განახორციელოს მგზავრის ფიზიკური დათვალიერება (დათვალიერების პროცესში შესაძლოა გამოყენებულ იქნას სპეციალური ტექნიკური საშუალებები, როგორცაა: მეტალო დეტექტორი, სხეულის სკანერი და სხვა).

## საქართველოს საბაჟო საზღვრის გადაკვეთისას რა შემთხვევაში წარმოეშობა ფიზიკურ პირს საქონლის დაკლარირების ვალდებულება?

- ▶ ეკონომიკური საქმიანობისათვის განკუთვნილი საქონლის შემოტანისას/გატანისას (განურჩევლად მისი რაოდენობისა და ღირებულებისა);
- ▶ იმ შემთხვევაში, თუ საქონლის შემოტანა შეზღუდულია ან/და საქონლის შემოტანისათვის საჭიროა ნებართვა ან ლიცენზია;
- ▶ იმ შემთხვევაში, თუ შემოტანილი საქონლის რაოდენობა ან/და ღირებულება აღემატება საქართველოს საგადასახადო კოდექსით დადგენილ დაუბეგრავ მინიმუმს;
- ▶ უცხოეთში ყოველ 6 თვეზე მეტი ხნით ყოფნის შემდეგ საქართველოში შემოსვლისას და საქართველოში მუდმივსაცხოვრებლად შემოსვლისათვის საქართველოს საგადასახადო კოდექსით გათვალისწინებული შეღავათებით სარგებლობის შემთხვევაში;

- ▶ საქართველოს საბაჟო საზღვარზე გადაადგილებული ნაღდი ფულის (ეროვნული ან/და უცხოური ვალუტა), ჩეკების ან/და სხვა ფასიანი ქაღალდების შემთხვევაში, თუ მათი ჯამური ოდენობა აღემატება 30 000 ლარს ან მის ეკვივალენტს სხვა ვალუტაში.
- ▶ ელექტრონული შესყიდვის გზით შეძენილი საქონლის საფოსტო გზავნილით შემოტანისას;

## რა დოკუმენტებს წარადგინს მძღოლი საქართველოს საბაჟო საზღვარზე ტვირთის გადაადგილებისას?

- ▶ სატრანსპორტო ზედნადები ან TIR-წიგნაკი;
- ▶ საქონლის ნასყიდობის დოკუმენტი:
  - ▶ საქონლის ნასყიდობის ხელშეკრულება;
  - ▶ ან ანგარიშ-ფაქტურა (ინვოისი);
  - ▶ ან სხვა საანგარიშსწორებო დოკუმენტი.
- ▶ საჭიროების შემთხვევაში, დამატებით, წარდგენილ უნდა იქნეს ლიცენზია/ნებართვა/სერტიფიკატი.

## როგორი საქონლის შემთხვევაშია აუცილებელი დამატებითი ნებართვისა და სერტიფიკატის წარდგენა?

- ▶ იარაღი ან ასაფეთქებელი მასალა;
- ▶ ნარკოტიკული ან ფსიქოტროპიული ნივთიერება;
- ▶ ანტიკვარული ან ხელოვნების ნიმუში;
- ▶ მომწამვლელი ნივთიერება ან მედიკამენტი;
- ▶ მცენარე ან/და ცხოველი, მათი ნაწილები ან მათგან მიღებული პროდუქტი;
- ▶ მაღალი სიხშირის რადიოელექტრონული მოწყობილობა, კავშირგაბმულობის საშუალება;
- ▶ რადიოაქტიური მასალა;
- ▶ ნარჩენი (მათ შორის, რადიოაქტიური ნარჩენი);
- ▶ ოზონდამშლელი ნივთიერება;
- ▶ სპეციალურ კონტროლს დაქვემდებარებული სამკურნალო საშუალება.